



**Republika e Kosovës**  
**Republika Kosova - Republic of Kosovo**

**ZYRA E RREGULLATORIT PËR ENERGJI**  
**REGULATORNI URED ZA ENERGIJU**  
**ENERGY REGULATORY OFFICE**



**Parimet ZRRE/Nr.01/2022**

**PARIMET PËR PËRCAKTIMIN E TARIFAVE PËR SHFRYTËZIM DHE TAKSAVE PËR  
KYÇJE NË SISTEMIN E SHPËRNDARJES**

Korrik 2022



Bordi i Zyrës së Rregullatorit për Energji sipas autoritetit të dhëne me Nenin 9 paragrafin 1 nën paragrafin 1.7., Nenin 15 paragrafin 1.5, Neni 26 paragrafin 1 nën paragrafin 1.1, Nenin 47 paragrafin 3 nën paragrafin 3.3 të Ligjit për Rregullatorin e Energjisë (Ligji Nr. 05/L-84), në seancën e mbajtur me datë 29 korrik 2022 miratoi ndryshimet dhe plotësimet e:

## **PARIMET PËR PËRCAKTIMIN E TARIFAVE PËR SHFRYTËZIM DHE TAKSAVE PËR KYÇJE NË SISTEMIN E SHPËRNDARJES**

### **PJESA I – DISPOZITAT E PËRGJITHSHME**

#### **Neni 1**

#### **Qëllimi dhe fushëveprimi**

1. Qëllimi i miratimit të ndryshimeve dhe plotësimeve të kësaj Rregulle është që të vendosen parimet për përgatitjen e Metodologjive nga Operatori i Sistemit të Shpërndarjes (OSSH) mbi përcaktimin e tarifave për shfrytëzim dhe taksave për kyçje në sistemin e shpërndarjes (me tutje “Parimet”)
  - 1.1. Kjo rregull i përcakton:
    - a) Parimet mbi të cilat OSSH duhet të hartojë propozimet për tarifën për shfrytëzim të sistemit të shpërndarjes (“Metodologjia e përcaktimit të tarifave për shfrytëzim të sistemit të shpërndarjes”), dhe
    - b) Parimet mbi të cilat OSSH duhet të hartojë propozimet për përcaktimin e taksave për kyçje në Sistemin e Shpërndarjes (“Metodologjia për përcaktimin e taksave për kyçje në sistemin e shpërndarjes”)
    - c) Parimet se si këto Metodologji do t’i parashtrihen Rregullatorit për aprovim.
2. Metodologjitë e parashtruara për aprovim duhet të jenë në pajtim me këto parime, si dhe të jenë përputhje me Rregullën për Kushtet e Përgjithshme të Furnizimit me Energji dhe me Rregullën për vendosjen e të hyrave të lejuara maksimale të Operatorit të Sistemit të Shpërndarjes.
3. Nëse Metodologjitë e parashtruara nuk janë në pajtim me parimet dhe Rregullat, atëherë Bordi i Rregullatorit do të kërkojë një arsyetim të plotë dhe të detajuar për këto mospërputhje në mënyrë që të vendosë lidhur me aprovimin e këtyre Metodologjive.



## Neni 2

### Përkufizimet dhe interpretimi

1. Shprehjet në këtë Rregull kanë kuptimet që janë përcaktuar me Ligjin për Rregullatorin e Energjisë, Ligjin për Energjinë, Ligjin për Energjinë Elektrike, si dhe Rregullat dhe Kodet e aprovuara nga ZRRE.
  - 1.1 **Aplikuesi** (parashtruesi i kërkesës)- do të thotë një person fizik apo juridik i cili i kërkon OSSH-së të bëjë kyçjen e re apo për të modifikuar kyçjen ekzistuese në rrjetin e shpërndarjes;
  - 1.2 **Kyçje e cekët** - nënkupton se parashtruesi i kërkesës do të ofroj me shpenzimet e veta apo do të paguaj vetëm ato kosto që shkaktohen nga krijimi i një kyçjeje të re në pikën më të afërt të përshtatshme të rrjetit ekzistues të shpërndarjes të përcaktuar nga operatori i sistemit të shpërndarjes;
  - 1.3 **Kyçje e thellë** - nënkupton se parashtruesi i kërkesës do të ofroj me shpenzimet e veta apo do të paguaj kostot e aseteve të nevojshme për kyçje në pikën më të afërt të përshtatshme të kyçjes në sistemin ekzistues të shpërndarjes plus çfarëdo kostosh indirekte që shkaktohen nga punë të ndërlidhura me përforcimin, zgjerimin apo rikonfigurimin e rrjetit ekzistues e të cilat shkaktohen si pasojë direkte e operimit të pikës së kyçjes;
  - 1.4 **kyçje e re e thjeshtë** – nënkupton kyçje të re me kushtet e thjeshtuara teknike të përcaktuara nga OSSH;
  - 1.5 **Prodhues** (gjenerues) - nënkupton personin fizik ose juridik që prodhon energjinë elektrike
  - 1.6 **Konsumator Prodhues** - nënkupton konsumatorin i cili konsumon energji elektrike nga sistemi por edhe mund të prodhojë energji elektrike që hyn në sistem;
  - 1.7 **Kapaciteti efektiv** - do të thotë kapaciteti total në secilën pikë të rrjetit i cili është në dispozicion për t'u shfrytëzuar nga shfrytëzuesit pa cenuar kufizimet teknike të operimit të rrjetit. Mund të klasifikohet duke iu referuar çfarëdo kriteri teknik përkatës apo standardeve në fuqi duke përfshirë por duke mos u kufizuar në, kapacitetin aktual të bartjes, kapacitetin e lidhjes së shkurtër, kufijtë e tensionit apo kufijtë e stabilitetit;
  - 1.8 **TU ose tensioni i ulët** - nënkupton tensionin i cili nuk tejkalon 1000 Volt të rrymës së ndryshueshme;
  - 1.9 **TL** - do të thotë tensioni i shpërndarjes më i lartë se 1000 Volt të rrymës së ndryshueshme;



- 1.10 **Taksa standarde për kyçje** - do të thotë taksa që kërkohet nga parashtruesi individual i kërkesës e cila është llogaritur për të pasqyruar koston mesatare për krijimin e kyçjes të ngjashme për atë klasë të parashtruesit të kërkesës;
  - 1.11 **Shfrytëzuesi** - ka kuptimin e njëjtë si ai në Kodin e shpërndarjes
2. Të gjitha shprehjet tjera të përdorura në këtë dokument do të kenë kuptimin në bazë të ligjeve të sektorit të energjisë.

## **PJESA II – PARIMET E PËRBASHKËTA**

### **Neni 3**

#### **Mos diskriminimi dhe pasqyrimi i koston**

1. Në hartimin e Metodologjisë së përcaktimit të taksave për kyçje dhe Metodologjisë për përcaktimin e tarifave për shfrytëzimin e sistemit të shpërndarjes të paraparë në Nenin 2 më lartë, OSSH duhet të ngarkojë ose ofron të ngarkojë me çmime cilindo konsumator për ndonjë kyçje apo shfrytëzim të sistemit, të cilat:
  - a) nuk janë diskriminuese dhe të ndryshme në aspektin material dhe teknik në mes të konsumatorëve të cilët parashtrojnë kërkesë për shërbim të ngjashëm; dhe
  - b) pasqyron, në masë të arsyeshme, kontributin që jep konsumatori i tillë për koston e përgjithshme të ofrimit të shërbimit të kërkuar.
2. Pa marrë parasysh kushtin e përgjithshëm të pasqyrimin të koston në strukturën e taksave dhe tarifave, OSSH mund të përcaktojë taksa mesatare apo të standardizuara për kyçje dhe tarifa për shfrytëzim të shërbimeve të sistemit nga cilado klasë e shfrytëzuesve ku:
  - a) shfrytëzuesit përbrenda asaj klase, bazuar mbi karakteristikat e kërkesës së tyre, në kuptim të gjerë janë të ngjashëm për nga koston të cilat i shkaktajnë OSSH-së (duke marrë parasysh vëllimet relevante, faktorët e ngarkesës, formën e ngarkesës, kushtet e ndërprerjes, lokacioni i stabilimenteve në të cilat kryhen shërbimet, data dhe kohëzgjatja e ndonjë marrëveshjeje mbi sistemin si dhe çfarëdo informatash tjera relevante);
  - b) caktimi i çmimit specifik për shfrytëzuesit përbrenda asaj klase do të çonte në kosto më të mëdha administrative për OSSH pa ndonjë përfitim materialisht të kompensueshëm për shfrytëzuesit sa i përket transparencës; dhe
  - c) Çmimi i tillë mesatar ka pak gjasa të shkaktojë ndonjë barrierë për konkurrencën.



#### **Neni 4**

#### **Thjeshtësia dhe transparencja**

1. Taksat dhe Tarifat duhet të jenë të thjeshta, transparente dhe të parashikueshme,
2. Taksat dhe Tarifat duhet të reflektojnë nevojën për optimizimin të shfrytëzimit të rrjetit dhe të pasqyrojë shpenzimet e shkaktuara për kyçje dhe shfrytëzim të sistemit nga shfrytëzues të caktuar.
3. Taksat dhe Tarifat duhet të marrin parasysh zhvillimet e ardhshme në strukturën e sektorit të energjisë elektrike dhe të lejojnë rregullim më të sofistikuar krahas zhvillimit të tregut.

### **PJESA III – METODOLOGJIA E PËRCAKTIMIT TË TARIFAVE PËR SHFRYTËZIM TË SISTEMIT TË SHPËRNDARJES**

#### **Neni 5**

#### **Metodologjia e përcaktimit të tarifave : kërkesat minimale**

1. Metodologjia e përcaktimit të tarifave duhet t'u mundësojë shfrytëzuesve të sistemit që të bëjnë një vlerësim të arsyeshëm mbi tarifën e aplikueshme për shfrytëzim të sistemit të shpërndarjes dhe duhet të përfshijë:
  - a) Bazën mbi të cilën do të llogariten tarifën për shfrytëzim të sistemit të shpërndarjes;
  - b) Bazën mbi të cilën do të bëhen tarifën e veçanta për kapacitetin në qarqet e sistemit të shpërndarjes;
  - c) Listën e çfarëdo tarife që mund të kërkohet për ofrimin dhe instalimin e njehsorëve, përfshirë njehsorët kontrollues, apo ndonjë sistem elektrik në pikat hyrëse apo dalje, të cilat ndihmojnë dhe janë të domosdoshme për lejimin e shfrytëzimit të sistemit dhe për mirëmbajtjen e njehsorëve dhe sistemeve të tilla;
  - d) Kriteret mbi të cilat merret vendimi i OSSH-së për të refuzuar përkohësisht qasjen në sistem, të cilat duhet të jenë objektive, dhe teknikisht e ekonomikisht të arsyetuar.

#### **Neni 6**

#### **Baza e përcaktimit të tarifave**

1. Në përcaktimin tarifave për shfrytëzuesit për përdorimin e sistemit në kuptim të Nenit 5.1 a), OSSH duhet të merr parasysh kostot afatmesme të mirëmbajtjes së një sistemi të sigurt dhe të besueshëm në mënyrë që të përmirësohet parashikueshmëria, stabiliteti dhe pasqyrimi i çmimeve në aspektin afatgjatë.



2. Në hartimin e Metodologjisë për përcaktimin e tarifave për shfrytëzim të sistemit, OSSH duhet të merr parasysh kostot afatgjate, marginale, kostot e shmangura të rrjetit që shkaktohen nga gjenerimi i shpërndarë dhe nga masat për menaxhimin e anës së kërkesës.

#### **Neni 7**

##### **Ndarja e kostos për shfrytëzim të sistemit**

- 1 Metodologjia duhet të respektojë parimet vijuese:
  - a) OSSH duhet të mbulojë kostot fikse përmes një koeficienti prej 0% ndaj gjenerimit dhe 100% ndaj kërkesës – (përmes tarifës për kapacitet);
  - b) OSSH duhet të mbulojë kostot variabile për shfrytëzim të sistemit përmes tarifave për energji;
  - c) Tarifat duhet të përcaktohen në mënyrën e cila mundëson reflektimin e kostos për ofrimin dhe mirëmbajtjen e sistemit të shpërndarjes, të disponueshëm në nivele të ndryshme të tensionit;
  - d) Nga shfrytëzuesit nuk duhet të pritët që të paguajnë për kostot kapitale, operative apo të mirëmbajtjes në lidhje me asetet të cilat nuk i shfrytëzojnë;
  - e) Tarifat duhet të pasqyrojnë kostot që i shkaktohen, ose që vlerësohet se i shkaktohen sistemit nga shfrytëzuesi apo nga klasa e shfrytëzuesit në kohën e pikut (kërkesës më të lartë) në sistem.

#### **Neni 8**

##### **Kostot e mbulueshme**

1. Deri në përmasat e të cilave kostoja e tillë mund t'i ngarkohet shfrytëzuesit (ose në rast të tarifave mesatare një klase të shfrytëzuesve), tarifat për shfrytëzim të sistemit mund të përcaktohen për të mbuluar:
  - a) Kostot kapitale dhe të punës për mirëmbajtjen e një sistemi të sigurt dhe të besueshëm, në përputhje me standardet kombëtare në fuqi që vlejné për bartjen e energjisë elektrike nga pika hyrëse e shfrytëzuesit deri te pika dalëse, dhe atë deri në masën ku këto kosto nuk mund të rikthehen nga ndonjë tarifë tjetër;
  - b) Kostot e mirëmbajtjes së tensionit dhe frekuencës në kuadër të kufijve kombëtar në fuqi;
  - c) Kostot e arsyeshme të humbjes në shpërndarje (si teknike ashtu edhe komerciale) në formën e furnizimeve shtesë të nevojshme për t'i mbuluar këto humbje në shpërndarje (siç përcaktohen nga Rregullatori);



- d) Kostot e ofrimit, instalimit dhe mirëmbajtjes së njehsorëve relevant, deri në masën ku këto kosto nuk rikthehen nga ndonjë tarifë tjetër; dhe
- e) Çfarëdo kosto tjetër të cilën, kohë pas kohe, Rregullatori mund ta aprovojë si të mbulueshme përmes sistemit të tarifave ashtu siç është përcaktuar në Rregullën për të Hyrat e OSSH-së.

### **Neni 9**

#### **Oferta e kushteve për shfrytëzim të shërbimeve të sistemit**

1. Në kërkesën e parashtruar nga ndonjë konsumator, OSSH duhet të ofrojë marrëveshje për ofrimin e shërbimeve të shfrytëzimit të sistemit.
2. Oferta në paragrafin 1 duhet të bëhet jo më vonë se tridhjetë [30] ditë kalendarike pas pranimit të kërkesës për kyçje në rrjetin me tension të ultë dhe nëntëdhjetë (90) ditë kalendarike për kyçje në rrjetin me tension të mesëm.
3. Oferta për të vënë në dispozicion shfrytëzimin e shërbimeve të sistemit duhet të përcaktojë:
  - a) pikën e kyçjes;
  - b) kapacitetin në disponim;
  - c) të gjitha shërbimet tjera të cilat mund të kërkohen me kërkesë; dhe
  - d) çmimet që duhet të paguhën për shërbimet e tilla.
4. Çfarëdo marrëveshje apo ofertë e bërë nga OSSH-ja duhet të jetë në pajtim me Ligjet e Kosovës, Kodin e shpërndarjes, licencën apo ndonjë rregull tjetër të lëshuar nga Rregullatori.



## PJESA IV – KYÇJA NË SISTEM

### Neni 10

#### Metodologjia e përcaktimit të taksave për kyçje: kërkesat minimale

- 1 Metodologjia e përcaktimit të taksave duhet të përgatitet në mënyrë që t'i mundësojë shfrytëzuesve të sistemit që të bëjnë një vlerësim të arsyeshëm mbi taksat e aplikueshme të kyçjes.
- 2 Metodologjia e përcaktimit të taksave duhet të përfshijë:
  - a) forma e ekzemplarëve ku janë të cekura materialet e nevojshme për kyçje dhe çmimet e materialeve (përfshirë koston për kryerjen e punëve dhe ofrimin dhe instalimin e linjave elektrike, impianteve apo njehsorëve), të cilat mund të kërkohen për qëllime të kyçjeve (në pikat hyrëse dhe dalëse) të sistemit të shpërndarjes për të cilat mund të paguhen taksa për kyçje dhe, sipas mundësisë, përfshijnë ngarkesa indikative kundrejt çdo pike të cekur në listë ose (nëse kjo nuk është e mundur) bazën mbi të cilën këto ngarkesa do të llogariten;
  - b) bazat mbi të cilën do të llogariten taksat kundrejt zgjerimit apo përforsimit të sistemit të shpërndarjes të cilën OSSH-ja vlerëson, në mënyrë të arsyeshme, se janë të domosdoshme për t'i ofruar një kyçje parashtruesit të kërkesës pa rrezikuar stabilitetin apo sigurinë e sistemit, apo cilësinë e furnizimit të shfrytëzuesve ekzistues të sistemit;
  - c) bazën mbi të cilën do të llogariten taksat ku sigurimi i linjave elektrike apo sistemit që duhet të instalohen janë të kapacitetit më të madh sesa që nevojitet për nevoja të parashtruesit të kërkesës;
  - d) bazën mbi të cilën do të llogariten taksat për mirëmbajtje dhe riparim të linjave të energjisë elektrike, sistemeve apo njehsorëve të instaluar për qëllime të sigurimit të kyçjes;
  - e) bazën mbi të cilën do të llogariten taksat në raport me de-energizimin e kyçjes së konsumatorit, çkyçjen nga sistemi i shpërndarjes të OSSH-së dhe largimin e linjave elektrike, sistemit dhe njehsorëve pas çkyçjes.
  - f) kriteret mbi të cilat merret vendimi i OSSH-së për të refuzuar përkohësisht qasjen në sistem, të cilat do të jenë objektive dhe teknikisht e ekonomikisht të arsyeshme.
- 3 Për t'iu shmangur dyshimit, në rastet kur asetet janë paguar nga kontributet e konsumatorit për koston e kyçjes, Baza e Rregulluar e Aseteve nuk do të përfshijë kontributet e konsumatorëve.





- 4 Metodologjia duhet të përfshij një listë të të gjitha informatave të kërkuara për kyçje në sistemin e shpërndarjes, përfshirë edhe formularët të cilët parashtruesit e kërkesës duhet t'i plotësojnë. Në rast të kyçjeve komplekse, OSSH mund të kërkojë informata shtesë nga parashtruesi i kërkesës.
- 5 Metodologjia e aprovuar duhet të publikohet në ueb faqen e OSSH-së dhe duhet të jetë lehtësisht e qasshme, ndërsa kopjet fizike duhet t'iu vihen në dispozicion pa pagesë parashtruesve të kërkesave të cilat nuk kanë qasje në media elektronike.

#### **Neni 11**

##### **Kyçja e gjeneratorit dhe konsumatorit prodhues**

- 1 Çdo person fizik apo juridik, gjenerator/prodhues apo konsumator prodhues mund të aplikojë për kyçje të re apo modifikim të kyçjes ekzistuese në Sistemin e Shpërndarjes, me qëllim të furnizimit me energji elektrike apo gjenerimit të energjisë elektrike.
- 2 OSSH-së i lejohe të kërkojë pagesë, sipas Metodologjisë së Taksave për Kyçje e cila do të miratohet nga Rregullatori, me qëllim të mbulimit të kostove që kanë të bëjnë me vlerësimin e kërkesës së parashtruar nga gjeneratorët për kyçje në sistemin e shpërndarjes.

#### **Neni 12**

##### **Taksat për kyçje**

- 1 Taksat e kyçjes do të vlejnjë për të gjithë aplikuesit, pa dallim, dhe struktura e tyre do të mundësojë mbulimin e shpenzimeve për punët e kryera nga OSSH, si për kyçje të re ashtu edhe për modifikimet ekzistuese.
- 2 Do të ketë dy lloje të taksave:
  - a) taksa shërbim të kyçjes;
  - b) taksa për kryerje të punimeve, nëse punët për ndërtimin e kyçjes kryhen nga OSSH.
- 3 Aplikuesi ka të drejtë të angazhoj një kontraktues të licencuar për punët e ndërtimit, nën mbikëqyrjen e OSSH-së.
- 4 Në rast se kërkesa për kyçje të re e tejkalon kapacitetin e disponueshëm të rrjetit, atëherë aplikuesi do të paguajë taksën për shërbim të kyçjes dhe taksën për kapacitet por vetëm për pjesën e përforcuar.
- 5 Kur kërkesa për kyçje të re e aplikuesit shtëpiak individual e tejkalon kapacitetin e disponueshëm të rrjetit, mirëpo kjo kërkesë është më e vogël se 5 kW, atëherë aplikuesi nuk duhet të ngarkohet për kapacitetin e tij të nevojshëm. Në këtë rast, OSSH do të bëjë rritjen e kapacitetit të rrjetit dhe kostot që ndërlidhen me të do të mbulohen përmes tarifave për shfrytëzimin e rrjetit.



- 6 Taksat për kyçje të thella do të aplikohen vetëm në rastet kur OSSH-ja nuk e ka në planin zhvillimor zgjerimin e rrjetit në pikën ku duhet të kyçet konsumatori.

### **Neni 13**

#### **Përcaktimi i taksave për kyçje**

- 1 OSSH parashtron Metodologjinë për përcaktimin e taksave për kyçje për aprovim te Rregullatori në përputhje me Rregullën për të Hyrat e OSSH-së me parimet e përcaktimit të taksave.
- 2 Taksa e kyçjes përbëhet nga taksa standarde (fikse) për shërbim të kyçjes, taksa për kapacitet dhe taksa e punës për ndërtim të rrjetit elektrik (nëse punët kryhen nga OSSH)
- 3 Kostot të cilat përbëjnë taksën e kyçjes përfshijnë shqyrtimin e kërkesës për kyçje, përgatitjen e ofertës për kyçje si dhe zgjidhjes teknike, projektin e kyçjes dhe implementimin e tij, duke përfshirë kostot e kyçjes së aseteve si dhe shpenzimet për punët që lidhen me instalimin, testimin dhe futjen në punë të aseteve të kyçjes.
- 4 Pas aprovimit të Metodologjisë, brenda tridhjetë (30) ditë kalendarike, OSSH duhet të parashtojë për aprovim në rregullator deklaratën e taksave për kyçje të llogaritura në përputhje me Metodologjinë.
- 5 OSSH-ja duhet t'i parashtojë një deklaratë të taksave në rregullator për aprovim, në përjashtim të taksave indikative (nëse propozohet ndryshim i taksave apo jo) të paktën një herë në vit.
- 6 Taksat indikative të parapara në metodologji duhet të jenë te bazuara në çmimet e tregut dhe, duhet ti dërgohen rregullatorit vetëm për informim dhe duhet të publikohen në faqen elektronike të OSSH dhe ZRRE.
- 7 Rregullatori do t'i aprovoj taksat apo refuzojë brenda gjashtëdhjetë (60) ditëve kalendarike nga data e dërgimit të taksave në rregullator.

### **Neni 14**

#### **Oferta e kushteve për kyçje**

- 1 Në rastet kur OSSH ka pranuar kërkesë formale për kyçje me të gjitha informatat e nevojshme sipas Metodologjisë së aprovuar për përcaktim të taksave, ai jep ofertë formale për të kyçur parashtruesin e kërkesës brenda afateve kohore të parapara me Rregullën për Kushtet e Përgjithshme të Furnizimit me Energji. Brenda dhjetë (10) ditëve kalendarike nga kërkesa për kyçjen e Aplikuesit, OSSH mund të njoftojë Aplikuesin që kërkohen informata shtesë dhe në një rast të tillë afati korrespondues për përgatitjen e Ofertës për Kyçje do të shtyhet për periudhën kohore të dorëzimit të informatave të kërkuara shtesë. Me kërkesë të konsumatorit për një kyçje të re apo të modifikuar, OSSH-ja duhet të ofrojë një para-llogari indikative dhe jo-obliguese për të ndihmuar konsumatorin që të hartojë buxhetin lidhur me kostot financiare të këtij projekti.



- 2 Oferta formale duhet të përmbajë kushtet teknike për kryerjen e kyçjes përkatëse, kapacitetin e kyçjes, kostot e studimit të fizibilitetit (nëse është i nevojshëm), përcaktimin e kryerjes së punëve, nëse ajo do të bëhet nga OSSH apo nga një kontraktues i licencuar, definimi i punëve të nevojshme varësisht nga lloji i kyçjes, lejet përkatëse apo autorizimet lidhur me të drejtën e shfrytëzimit të pronës, të gjitha taksat relevante, si taksa standarde, taksa për kapacitet, apo taksa për punët e kryera nga OSSH, instalimin e matësve elektrik dhe pajisjeve tjera për mbrojtje dhe monitorim, specifikimin teknik, kushtet e transferimit të aseteve mes aplikuesit dhe OSSH, në rastet kur kërkohet ky transferim, definimi i periudhës kohore maksimale për punët që kryhen qoftë nga OSSH qoftë nga kontraktuesi i licencuar.
- 3 Nëse gjatë konsultimeve ndërmjet OSSH dhe Aplikuesit për kyçje aplikacioni konsiderohet të jetë kompleks, atëherë OSSH mund të kërkojë të kryhet një studim fizibiliteti me qëllim që të analizohen më shumë opsione për kyçje si dhe të ketë vlerësim të duhur të kostove për çdo opsion sipas nevojës.

#### **Neni 15**

##### **Obligimet dhe te drejtat e aplikuesit**

- 1 Nëse Aplikuesi pranon ofertën e OSSH-së për tu kyçur në Sistemin e Shpërndarjes, ai duhet ta pranoj atë ofertë në pajtim me të gjitha kushtet e saj, përfshirë: kushtet e zgjidhjes teknike, mundësinë që OSSH të bëjë implementimin e rrjetit të ri si edhe mundësinë e transferimit të aseteve të Aplikuesit të OSSH. Në rastet e refuzimit nga pala për transferin e aseteve tek OSSH, atëherë pika matëse do të vendoset në pikën e kyçjes së OSSH.
- 2 Pas pranimin të Ofertës për Kyçje, Aplikuesi nënshkruan marrëveshjen e ndërtimit dhe bënë pagesën sipas Ofertës për Kyçje të OSSH, brenda afatit prej tridhjetë ditësh (30) nga dorëzimi i Ofertës së Kyçjes. Marrëveshja e ndërtimit e nënshkruar nga të dyja palët do të krijojë një marrëveshje ligjërish të detyrueshme midis Aplikuesit dhe OSSH-së.
- 3 Nëse Aplikuesi nuk është i kënaqur me kushtet e ofruara nga OSSH ose me trajtimin e kërkesës për kyçje të OSSH-së, Aplikuesi mund të iniciojë një ankesë pranë OSSH sipas Rregullës për Zgjidhjen e Ankesave dhe Kontesteve në Sektorin e Energjisë. Nëse Aplikuesi ende nuk është i kënaqur me veprimet e OSSH-së ka të drejtë të iniciojë ankesë pranë Rregullatorit.
- 4 Gjatë periudhës për përgatitjen ofertës për kyçje, kapaciteti në sistemin e shpërndarjes do të konsiderohet ngarkesë e rezervuar për Aplikuesin.

#### **Neni 16**

##### **Refuzimi i përkohshëm i kërkesës**

OSSH mund të refuzoj të kyçë një Aplikues përkohësisht, vetëm nëse ajo kyçje nuk është në përputhje me dispozitat e Ligjeve, Rregullave dhe Kodeve në fuqi. Në rast të refuzimit të kyçjes, OSSH lëshon dhe



dërgon tek Aplikuesi një njoftim në formë të shkruar dhe paraqet arsyen e refuzimit të përkohshëm brenda periudhës që nuk tejkalon tridhjetë (30) ditë kalendarike prej datës së dërgimit të aplikacionit.

#### **Neni 17**

#### **Rastet Speciale**

OSSH përmes metodologjisë së kyçjes do të përcaktojë të gjitha aspektet që lidhen me rastet e veçanta, varësisht nga specifikat e aplikimit, që do të mund të përfshijë kyçjet e përkohshme për objektet në ndërtim e sipër apo kyçjet që lidhen me objektet e ndryshme afariste, duke përfshirë edhe qendrat tregtare.

#### **Neni 18**

#### **Përparësia e kyçjes për pikën e njëjtë të kyçjes**

Kërkesa për kyçje për pikën e njëjtë të kyçjes, kur dy apo ma shumë konsumator kërkojnë kyçje në pikën ku kapaciteti rezervë është i pamjaftueshëm apo ka kufizime tjera në rrjet të cilat pengojnë kyçjen e të dyve në rrjet, atëherë zbatohet parimi që Aplikuesi i parë shërbehet, kurse për Aplikuesin e dytë OSSH-ja do të bëjë propozim për kyçje në një pike tjetër.

#### **Neni 19**

#### **Bashkëpunimi i OSSH dhe OST për kyçjet e thella**

Në rastet e realizimit të kyçjeve ku përfshihet edhe zgjerimi i sistemit të transmetimit, taksat do të aplikohen si për rrjetin e shpërndarjes ashtu edhe për atë të transmetimit, përderisa OST dhe OSSH do të koordinohen rreth shpërndarjes së kostove.



## **Neni 20**

### **Të Drejtat e Kyçjes së Re**

- 1 Metodologjia e përgatitur nga OSSH do të definojë të gjitha veprimet që lidhen me të drejtat e kyçjes së re, duke marrë për bazë parimet e përvijuara në këtë dokument, si dhe do të marrë parasysh të drejtat e shfrytëzimit, servitutit dhe të drejtat e pronësisë, të cilat do të aplikohen në tërësi në pajtim me dispozitat përkatëse të Ligjit për Energjinë.
- 2 Konsumatorët që kanë në pronësi të tyre pika të kyçjes, përfshirë aparaturat matëse, mund t'i transferojnë asetet e tyre tek operatorët e sistemit pa asnjë kompensim por në gjendje të rregullt teknike, përderisa stabilimentet energjetike, si linjat, shtyllat, transformatorët, e kështu me radhë, nuk mund të jenë në posedim privat përpos nëse përdoren vetëm nga një konsumator. Në rast të kyçjes së më shumë konsumatorëve, asetet kalojnë në OSSH pa asnjë kompensim. Mirëmbajtja e kyçjeve bëhet sipas çmimoreve të miratuara nga ZRRE, ndërsa mirëmbajtja e kyçjes së thellë është përgjegjësi e OST dhe OSSH.

## **Neni 21**

### **Kompensimi i Aplikuesit të Parë nga Aplikues të Rinj**

- 1 Asetet të cilat janë ndërtuara para hyrjes në fuqi të metodologjisë së kyçjes dhe ato të ndërtuara për furnizim të objekteve kolektive nuk do të kompensohen.
- 2 Aplikuesi i/e parë që cili ka investuar në ndërtimin e aseteve për kyçje, do të njoftohet nga OSSH-ja për mundësinë dhe mënyrën e kompensimit, si dhe për vlerën e aseteve të tyre në momentin e kyçjes në sistemin e shpërndarës.
- 3 Në momentin e investimeve nga Aplikuesi i parë, OSSH do të bëjë vlerësimin e aseteve të investuara në bazë të çmimeve aktuale të aprovuara nga ZRRE.
- 4 OSSH, përmes metodologjisë së kyçjes, dhe mbi bazën e parimeve të përcaktuara këtu, do të operacionalizojë aspektet e aplikimit të taksave në rastet e kyçjes së aplikuesve të ri në asetet të cilat janë paguar nga aplikuesi i mëhershëm, si dhe çështjet e transferimit të aseteve në lidhje me këtë qëllim.
- 5 Kompensimi i aplikuesit të parë nga aplikuesit tjerë do të bëhet përmes OSSH-së.
- 6 Mënyra dhe vlera e kompensimit do të përgatitet nga OSSH dhe do të jetë pjesë e Metodologjisë së Taksave për Kyçje.

## **PJESA V - DISPOZITAT E PËRGJITHSHME**

### **Neni 22**

#### **Gjuha zyrtare**

Këto Parime janë nxjerrë në gjuhën shqipe dhe do të përkthehen në gjuhën serbe dhe angleze. Në rast të mospërputhjes ndërmjet versioneve, do të mbizotërojë versioni në gjuhën shqipe.



**Neni 23**  
**Ndryshimet**

ZRRE mban të drejtën që ta ndryshojë ose ta modifikojë çdo dispozitë të këtyre Parimeve pas procesit të rishikimit të konsultimit publik.

**Neni 24**  
**Shfuqizimi**

Këto parime shfuqizojnë "Parimet e përcaktimit të ngarkesave të shpërndarjes" të aprovuar nga Bordi i Zyrës së Rregullatorit për Energji në vitin 2012.

**Neni 25**  
**Interpretimi**

Në rast se ka paqartësi për dispozitat e këtyre Parimeve, Bordi do të nxjerrë informacione shpjeguese.

**Neni 26**  
**Hyrja e fuqi**

Parimet hyjnë në fuqi në ditën e miratimit nga Bordi i ZRRE-së, dhe do të publikohet në faqen zyrtare elektronike të Rregullatorit.


**Bordi i ZRRE-së:**

  
Ymer Pejzullahu, kryesues

  
Selman Hoti, anëtar

  
Izet Rushiti, anëtar

  
Lutfije Dervishi, anëtare

  
Gani Buçaj, anëtar